

UCAPAN PERDANA MENTERI DI UPACARA MERASMIKAN MASJID KAMPUNG SERI BENGKAL, MUKIM 6, BATU PAHAT, PADA 12 JANUARI, 1979

Assalamualaikum Warahmatullahi Wabarakatuh.

Yang Berhormat Dato Abdul Rahman b. Mahmood, Yang Berhormat Dato Haji Ngah b. Abdul Rahman, Yang Berhormat Encik Mohd Shariff Lasim, Yang Berusaha Pegawai Daerah Batu Pahat, Yang Berbahagia Dato Yusak, Tuan-tuan dan puan-puan sekalian.

Bismilla-hirrahma-nirrahim.

Saya bersyukur kehadiran Allah Subhanahu Wataala kerana dengan limpah rahmat dan izinNya dapat saya melakukan lawatan ke Kampung Seri Bengkal dan seterusnya merasmikan masjid di kampung ini. Saya mengucapkan terima kasih serta setinggi-tinggi penghargaan kepada Ahli Jawatankuasa Masjid Kampung Seri Bengkal serta penduduk-penduduk di kawasan ini di atas penghormatan yang telah diberikan kepada saya di upacara ini.

Dalam perjalanan tadi saya telah diberi penghormatan merasmikan masjid Kampung Parit Yop Darat. Saya mengucapkan terima kasih serta penghargaan kepada Ahli Jawatankuasa Masjid serta penduduk-penduduk Kampung Parit Yop Darat kerana telah bersusah payah membuat perediaan untuk majlis perasmian itu. Saya memanglah ingin membuat lawatan ke kampung-kampung terutama di kawasan saya sendiri untuk beramah mesra dengan penduduk-penduduk di samping dapat mengetahui masalah dan kesulitan tempatan.

Tetapi sebagaimana yang pernah saya terangkan dahulu bahawa oleh kerana tugas dan tanggungjawab negara saya tidak dapat membuat lawatan seperti ini seberapa kerap yang saya kehendaki. Syukurlah pada hari ini saya telah dapat menghadiri di tiga buah masjid dalam daerah Batu Pahat.

Tuan-tuan dan puan-puan sekalian,

Masjid Kampung Seri Bengkal yang baru ini yang akan dirasmikan sebentar lagi merupakan masjid yang ke 26, yang dibina oleh Kerajaan dalam daerah Batu Pahat dalam masa lima tahun yang lalu. Tiap-tiap



Gambar menunjukkan Y.A.B. Datuk Hussein Onn sedang memotong pita di Pembukaan Rasmi, Masjid Jamek Kampung Seri Bengkal, Mukim 6, Batu Pahat, Johor pada 12.1.1979.

tahun Kerajaan Persekutuan mengeluarkan perbelanjaan yang besar bagi membina masjid-masjid baru dan membantu memperbaiki atau membesarkan bangunan-bangunan masjid yang lama untuk kegunaan umat Islam di tanahair.

Melalui Pusat Islam Kerajaan Persekutuan telahpun menjalankan beberapa kursus latihan bagi Imam, Bilal dan Khatib. Ini adalah sejajar dengan hasrat Kerajaan hendak meningkatkan mutu serta memesatkan lagi kegiatan yang harus dijalankan di masjid-masjid.

Bangunan masjid bukanlah dihadkan kegunaannya untuk ibadah sembahyang sahaja tetapi harus dibuka pada setiap masa kepada penduduk-penduduk yang hendak bermuzakarah sesama sendiri bermesyuarah bagi membincangkan kemajuan pembangunan kampung. Kelas-kelas agama bagi semua lapisan masyarakat Islam dan kelas-kelas muqaddam atau Quran patutlah diselenggarakan oleh masjid bagi faedah kanak-kanak dan orang-orang dewasa. Dengan jalan ini maka bangunan masjid yang dibina dengan harga berpuluh ribu ringgit itu dapatlah digunakan sepenuhnya untuk kepentingan masyarakat Islam.

Saya harap masjid yang baru ini akan dapat meningkatkan lagi kegiatan keagamaan dan pembangunan di kampung ini di samping dapat mengeratkan lagi kerjasama dan perpaduan penduduk-penduduk di kawasan ini.

Tuan-tuan dan puan-puan sekalian,

Saya juga bersyukur kehadiran Allah Subhanahu Wataala, kerana keadaan di kawasan ini yang dahulunya lazim dilanda oleh banjir telahpun dapat diperbaiki. Dengan adanya rancangan pembersihan sungai dan taliair, tanaman dan ternakan, mata pencarian penduduk-penduduk di sini tidak lagi terjejas. Dengan adanya keadaan yang bertambah baik ini maka penduduk-penduduk patutlah lebih berusaha dengan mengerjakan kebun-kebun mereka supaya tanah yang nilainya telah meningkat naik dapat mengeluarkan hasil yang sebanyak-banyaknya.

Saya merasa dukacita apabila diberitahu bahawa ramai juga penduduk-penduduk yang terdorong dengan kenaikan harga tanah yang tinggi ini telah menjual kebun-kebun mereka dan berhijrah ke tempat lain. Khabarnya penjualan yang melibat sejumlah hampir 100 ekar kebun-kebun telah berlaku di bahagian laut Parit Ismail sehingga hendak mempupuskan kampung tersebut. Kejadian seperti ini amatlah menyedihkan lebih-lebih lagi ianya berlaku di masa Kerajaan sedang pesat membawa pembangunan ke kawasan di sini.

Tuan-tuan dan puan-puan sekalian,

Sempena dengan lawatan saya di sini serta mengambil berkat upacara perasmian masjid ini, saya sukalah mengumumkan bahawa rancangan membina jambatan menyeberangi Sungai Simpang Kanan ini serta membesarkan jalan Kampung Parit Yaani dan Kampung Sengkuang akan dimulakan pada tahun ini. Kedua-dua projek ini, yang akan memakan belanja \$1.8 juta akan dilaksanakan secara berperingkat-peringkat.

Dengan siapnya kelak projek besar ini maka kegiatan ekonomi di kawasan ini akan bertambah pesat di samping dapat memberi kemudahan kepada penduduk-penduduknya bagi memasarkan hasil-mahsul kampung. Kedudukan Pekan Parit Yaani dan Pekan Seri Gading akan menjadi bertambah maju. Saya harap mulai dari sekarang penduduk-penduduk di kawasan ini hendaklah merancang masa depan mereka sendiri supaya segala kemudahan dan peluang yang akan wujud dari pembinaan jambatan dan jalanraya ini dapat digunakan sepenuhnya. Penubuhan syarikat kerjasama serbaguna bagi mengendalikan perusahaan pengangkutan seperti bas, teksi dan lori, merupakan salah satu rancangan yang mesti difikirkan supaya peluang yang baik ini tidak akan terlepas ke-tangan orang luar.

Lain-lain kemudahan yang akan dibawa ke kawasan ini ialah projek bekalan air dan letrik. Memandangkan kemajuan-kemajuan ini, saya sukalah menasihatkan penduduk-penduduk di kawasan ini, supaya jangan menjualkan tanah dan kebun mereka. Sebaliknya mereka hendaklah berusaha bersungguh-sungguh mengerjakan tanah dan kebun mereka itu.

Kerajaan sentiasa memberi bantuan dan pertolongan kepada petani dan pekebun kecil yang ingin maju. Bantuan-bantuan subsidi boleh didapati dari Jabatan Pertanian, RISDA dan sebagainya untuk tanaman-tanaman tertentu atau dari Jabatan Haiwan berkenaan dengan ternakan.

Bagi tahun 1979, Kerajaan telahpun meluluskan peruntukan sebanyak 770 juta ringgit bagi pembangunan pertanian dan luar bandar di seluruh negara. Ini termasuklah bantuan bagi menggalakkan pekebun-pekebun kecil mengusahakan tanaman selingan. Tanaman kopi, koko atau lain-lain bahan pertanian yang boleh menambahkan hasil petani boleh mendapat bantuan berupa benih dan baja serta khidmat nasihat dari pegawai-pegawai Jabatan Pertanian. Apa yang diperlukan ialah semangat rajin berusaha.

Kepada penduduk-penduduk kampung yang bekerja di ladang, saya sukalah mengingatkan supaya mereka mengerjakan kebun-kebun mereka di masa-masa lapang bagi menambah pendapatan. Mereka janganlah semata-mata mengharap gaji sebagai pekerja. Mengusahakan tanah dan kebun-kebun dengan tanaman dan ternakan dapat meringankan beban sara hidup. Dengan jalan ini maka dapatlah mereka menikmati keadaan hidup yang lebih tinggi dan lebih sempurna. Kerajaan telahpun dan akan terus menjalankan apa jua langkah serta melaksanakan projek dan rancangan yang boleh membaiki lagi keadaan hidup serta meninggikan lagi taraf ekonomi rakyat terutama penduduk-penduduk kampung. Bagi mencapai hasrat yang dicita-citakan ini, rakyat jelata khususnya mereka yang tinggal di kawasan-kawasan luar bandar hendaklah menunaikan peranan mereka masing-masing.

Semangat rajin berusaha hendaklah diamalkan pada setiap masa. Semangat ini hendaklah juga disuburkan dalam hati sanubari anak-anak kita yang masih di bangku-bangku sekolah. Pelajaran adalah asas utama bagi mencapai kemajuan. Usaha adalah tangga kemajuan. Dalam zaman sains dan teknologi kedua-duanya adalah penting bagi memperoleh kemajuan. Kita mestilah memajukan diri kita sendiri, keluarga kita, dan masyarakat kampung kita sendiri. Dengan membuat demikian, maka barulah kita dapat menyumbangkan usaha dan tenaga kita kepada kemajuan negara. Kemajuan dan kemakmuran negara bergantung kepada sikap rakyatnya. Oleh itu saya menyeru seluruh rakyat supaya mengamalkan sikap ingin maju serta mempraktikkan semangat rajin berusaha. Sikap dan semangat ini akan dapat mengukuhkan lagi azam dan tekad kita bagi mencapai kemajuan yang lebih tinggi dalam tahun 1979.

Tuan-tuan dan puan-puan sekalian,

Berbalik kepada upacara perasmian masjid ini saya sukalah menyatakan betapa pentingnya Kerajaan Persekutuan menitikberatkan pembangunan rohaniah, supaya kemajuan dalam bidang pembangunan ekonomi dan sosial dapat memberi kesan yang lebih bermakna kepada rakyat. Dari tahun ke setahun, bilangan projek keagamaan seperti pembinaan masjid-masjid, surau atau madrasah, sekolah-sekolah agama, bangunan gereja, kuil dan lain-lain rumah ibadah, adalah bertambah bagi memenuhi keperluan rakyat berbilang kaum dan agama di tanah air kita. Dalam tahun lalu sahaja Kerajaan Persekutuan telah melaksanakan sebanyak 3,209 projek keagamaan dengan perbelanjaan sejumlah kira-kira 47.2 juta ringgit berbanding dengan sebanyak 565 projek yang memakan belanja lebih kurang 17.3 juta ringgit dalam tahun 1977. Dalam tahun 1976 pula Kerajaan telah mengeluarkan perbelanjaan sebanyak 6.5 juta ringgit bagi melaksanakan 349 projek keagamaan.

Sungguhpun peruntukan bagi tahun ini belum lagi dapat ditentukan usaha-usaha ke arah meningkatkan kemajuan dalam bidang ini akan terus dipesatkan. Dengan jalan ini maka dapatlah kita memastikan supaya kemakmuran yang diperolehi itu tidak akan membawa akibat-akibat buruk yang boleh menjejaskan kemajuan dan keselamatan negara.

Pembangunan dalam bidang rohaniah ini ialah bertujuan mengukuhkan semangat keperibadian warganegara iaitu faktor yang penting bagi mengatasi dan menghadapi gejala-gejala yang tidak sihat yang lazimnya dibawa bersama-sama dengan kemajuan kebendaan. Dengan adanya pendidikan ugama yang sempurna di masa kecilnya dan seterusnya diamalkan dalam penghidupan sehari-hari semasa dewasanya generasi muda kita tidaklah mudah dipengaruhi oleh kegiatan-kegiatan yang boleh meruntuhkan akhlak. Semangat keagamaan yang kuat dan keperibadian yang tinggi adalah penting ditanam dan disuburkan di kalangan generasi muda ini bagi memastikan masa depan yang terjamin bagi mereka. Masa depan negara bergantung di atas semangat dan sikap generasi muda kita ini. Adalah menjadi tanggungjawab dan kewajipan kita semua, memberi panduan dan nasihat kepada generasi muda kita ini supaya mereka dapat membentuk sikap dan pemikiran yang lebih positif dan waras. Dengan jalan ini, maka dapatlah kita memastikan supaya kemakmuran, keamanan dan perpaduan yang terdapat dan wujud sekarang ini dapat terus dipelihara dan dikekalkan ke beberapa zaman yang akan datang.

Akhirnya saya sukalah merakamkan penghargaan kepada semua pihak yang telah sama-sama berusaha menjayakan upacara ini. Sambutan dan kerjasama yang diberikan di perasmian masjid ini, ialah membuktikan perpaduan di kalangan penduduk-penduduk di sini. Persefahaman ini adalah penting bukan sahaja bagi meninggikan syiar Islam bahkan bagi mencapai kemajuan dalam lapangan pembangunan jasmaniah. Dengan jalan ini perimbangan dalam kedua-dua bidang ini dapatlah diwujudkan dan diselaraskan bagi membolehkan kita menikmati kebahagiaan di dunia dan di akhirat.

Tuan-tuan dan puan-puan sekalian,

Dengan nasihat dan pesanan yang telah saya lahirkan itu maka dengan nama Allah Yang Maha Pemurah lagi Amat Mengasihani, saya dengan rasminya mengisytiharkan pembukaan masjid Kampung Seri Bengkal ini. Wabillahit-taufiq, wassalamualaikum warahmatullahi wabarakatuh.